

Абай атындағы Қазақ Ұлттық Педагогикалық Университетінің «Мектепке дейінгі, әлеуметтік педагогика және өзін-өзі тану білім беру бағдарламалары» бөлімі 22-23 сәуірде Қазақстан Республикасы базалық ЖОО студенттері арасында 68012-«Мектепке дейінгі тәрбиелеу және оқыту педагогикасы» білім беру бағдарламасы бойынша XIII Республикалық пәндік олимпиадасын онлайн жүйесінде ұйымдастырды. Олимпиадаға 13 жоғары оқу орнының командалары қатысты. Олимпиада ешқандай кедергісіз жаңа онлайн форматта ашық, әділ, жоғары деңгейде өтті.

Аталған олимпиадаға Ы. Алтынсарин атындағы Арқалық педагогикалық институтының «Мектепке дейінгі және бастауыш білім беру» кафедрасының аға оқытушысы, педагогика ғылымдарының магистры, АрқПИ доценті Р.Е. Жандилдинаның жетекшілігімен «Құлжанова ізбасарлары» командасы қатысып, инновациялық бағыттағы педагог тәрбиешінің шеберлігін айқын көрсете отырып, жүлделі 1-орынды иеленді. Топ құрамында «Мектепке дейінгі тәрбиелеу және оқыту педагогикасы» білім беру бағдарламасының 3 курс студенттері Солтанбек Аймерей, Жақсылық Шұғыла, сондай-ақ 2 курс студенттері Несіпбай Дильназ, Сүлеймен Жазира бар. Команда мүшелері:

«Алғашқы ұстаз Ыбырай,
Мектеп ашқан елденбіз!

180 жыл мерейлі,
Тойын атай келгенбіз.
Асан, Үсен, Мақта қыз,
Мәніне терең енгенбіз.
Мерекелі белденбіз,
Берекелі жерденбіз!
Ахан, Жақаң туылған,
Киелі Торғай төрденбіз!», - деген таныстыруынан бастап бәйгеде оқ бойы оза шауып отырды. «Құлжанова ізбасарлары» командасы олимпиаданың барлық кезеңдері бойынша үздік нәтиже көрсетіп, өздерінің алған білімдері мен меңгерген білік-дағдыларын шығармашылықпен ұштастырып, шеберлік деңгейлерін танытты. Топ мүшесі Жазира Сүлеймен «Студент-Новатор» номинациясын иеленді.

Пәндік олимпиадаға шәкірттер дайындап, оларға бағыт-бағдар көрсетіп отыру - жауапты жұмыс. Үздіксіз жүйелі дайындық, тынымсыз еңбек, жан-жақты ізденіс қана танымды кеңейтіп, кәсібилікке баулиды. Осы тұста команда жетекшісі, мектепке дейінгі білім саласының майталман маманы Р.Е.Жандилдинаның еңбегі зор. Ол студенттерді білім нәрімен сусындатып, кәсіби-тұлғалық әлеуетін, шығармашылық қабілетін, креативтілігін, бірегейлігін талдау және логикалық ойлау қабілетін дамыту үшін бар күш-жігерін аямай қызмет етеді. Әрине, адал еңбектің өтемі - жемісті нәтиже екені сөзсіз. Биылғы жеңіс - атаулы жылдың, ұлы ағартушы Ы.Алтынсариннің туғанына 180 жыл толуына, алдағы сәуірдегі институттың 50 жылдық мерейтойына лайықты тарту болды.

**Зәуре ҒАЛЫМЖАНОВА,
«Мектепке дейінгі және бастауыш білім беру»
кафедрасының аға оқытушысы.**

Жүлдегерлер ортамызда

